

嘉興府志卷三十五

人物志

列傳 文苑

嘉興縣

漢

莊忌史稱嚴客游梁與鄒枚並見尊重子助舉賢良擢中

大夫閩越圍東甌田蚡謂無煩中國往救助詰蚡乃遣

助發兵救之閩越擊南越帝為發兵淮南王安上書諫

使助諭淮南拜會稽太守入留侍中淮南王來朝厚遺

助及反事與助連棄市



唐

邱丹官諸暨令歷員外郎隱居臨平山與韋應物鮑防呂
渭諸牧守往還唱和錢起李端亦多贈言丹有詩十一
首并聯句諸作及江南長安十二月景詞行世

宋

謝安字化南蘇州嘉興人爲文慕韓柳與盧稹齊名時謂
之盧謝稹吳懦安勁急反相友善端拱初舉進士補昭
應主簿徙伊闕連知華容公安二縣卒年三十四集二
十卷

呂渭老字聖求有文行以詩名宣和末爲朝士歸老於家

所存詞二卷詩一百三十餘首同邑有錢諷字正初
撰回谿史韻附韻類事若干卷

康與之字伯可建炎中駕駐維揚上中興十策聲名大振
時不能用其後擢爲臺郎值慈寧歸養兩宮燕樂與之
專應制爲歌詞腴豔粉飾世以柳耆卿比之著有樂府

五卷

聞人滋字茂德璪子喜留客食然不過蔬豆郡人求館客
者多就謀之蓄書喜借人自言作門客牙充書籍行開
豆腐羹店會爲敕局刪定官談經義滾滾遂于小學

呂重庚字申伯博學能文端平間登進士第官至大理正

自號九山著有九山集

徐聞詩字子言資性穎悟八歲通九經理宗朝由童科擢
紹定第仕至惠州守

元

孫固字以貞性恬淡好讀書辟署華亭縣學事與楊維禎
陶宗儀詩筒往來酬唱成帙嘗自題其齋曰聽雪著有
聽雪齋稿

陳堯道字宗遠自號竹林居士通五經元亂不仕與楊維
禎輩相倡和所著有竹林集子約字博文綱簡文繹思
文緝熙文皆以家學切磨善言名理爲歌詩自相師友

而約尤貫綜百氏仕明爲大理卿終山西布政使有一
默居士集

衛培字寧深涇之曾孫也涇自有傳培性端恪博通經史
明於典故延祐七年郡守以培充貢龍虎榜賦文不起
草雖被黜識者推之知州王安貞聘訓導州學號月山
先生所著文十卷曰遏耳集

黃玠字伯成與趙孟頫黃潛善不喜儲蓄有輒貸人晚值
兵亂益貧困處之泰然爲詩沖淡夷曠後家弁山著弁
山小隱吟錄知非舊稿唐詩選纂韻錄行世

陸景龍字德陽至順己巳舉賢書官明州學正著有湖峯

稿工於咏物

顧深字淵白元季入京獻燕都賦不得志歸晚年領教岳陽同時錢大有字明遠發憤工詩楊鐵崖稱其善學

葉廣居字居仲與鄉人張翥銜堪爲文字交仕至浙江儒學提舉晚年築室西泠橋陶情詩酒著有自得齋集銜堪工文詞善古隸隱居魏塘以易授徒有芝林集又同時有黃魯德亦魏塘人有詩才邑景多其題咏

明

張翥字翔南先世建德人徙嘉興博極羣書作文敏捷好爲奇語至正乙巳薦于鄉與金綱俱以龍門賦中高等

舉甬東書院山長不就明初徵入禮局事竣賜白金歸家近陸宣公祠庭有巨梓因名所著曰梓宇集

陶振字子昌自號釣鰲生學於楊廉夫治詩書春秋三經洪武間薦授吳江訓導嘗坐佃官房逮至京進紫金山金水河二賦得釋改安化教諭隱于九峯有釣鰲海客雲間清嘯二集

郭秉心字公葵以善詩見推于徐一夔唐肅永樂間有姚塆字文政亦以詩名與夏原吉相友善以明經授武康訓導有七香詩稿

王鏞梅會里人洪武庚戌舉人官翰林院編修弟鈞字天

全有合刻詩稿失傳

姚黼字廷章宣德間布衣御史綬之父也擅隱居之樂能寫山水宗岳雪樵工詩日與陳顥韓永倡和優游自得人以可閒先生稱之顥字漢昭雲間錢博稱其詩閒雅典厚力追唐人有竹鄰子稿

懷悅字用和居相湖南園亭詩酒之會極一時之盛輯有士林詩十卷後有沈章字宗玉居苧莊畧徇相通環以水竹詩頗崛奇著有苧村集

王達字公路永樂甲午舉人會試不第卒業太學謁選得襄陽衛經歷不就歸授徒自給長于詩賦著有南溪吟

卷管窺集雲溪遺稿

包鼎字汝和鼎弟也成化戊戌進士授無錫令與項忠金禮諸公爲耆英會彙詩文爲一集從子憲字循之以貢任湖廣訓導陞山東教諭人以君子稱之

彭輅字子殷幼穎異才名藉甚登嘉靖丁未進士知新淦縣陞刑部郎罷歸時秀水有范言以文辭與輅相頡頏言宗韓歐有體裁輅閱肆綺麗出入史漢各負氣不相下然輅不宜於人官亦不顯著有比部集

金九成字伯韶父應秋以貢諭六合清學田贍貧士以文行課諸生九成幼警敏善屬文九歲題詩郡齋爲郡守

龔勉所重年十二補弟子員萬歷丙子舉于鄉再上春
官不第歸臥武原望虞山著史論史辨各三十卷又別
爲元史考誤四十卷詩格在高季迪袁景文之間五言
今體尤爲道上子壽明敦行好施孫善鎔以藝事稱

馮元鑑字鑑之萬歷庚子舉人授廬州教諭陞涪州知州
乞歸結廬雙溪之濱高雅善文尤工書法行草及署扁
皆擅絕一時閉戶讀書人罕覩其面同時載灝字升之
丙午舉人亦工書法與元鑑齊名

鄒衡字汝平弱冠補諸生郡守柳玟延諸生曾春平湖教
諭林光修府志旣成衡惜其缺畧復作嘉興府志補

陳泰交字穉孚性豪舉慷慨慕義同里黃宮詹洪憲見而
奇之爲文高古奇崛膚學讀之不能句項進士鼎鉉好
奇文與爲莫逆交早卒著有同倩先生集

徐宏澤字春門居春波里少曾割股療親疾有孝行家貧
逐什一之利市聲紛呶宏澤下簾靜坐泊如也工詩類
元白畫出入子久叔明仲圭三家書法吳興尤愛張伯
雨時稱春門三絕晚登峩眉窮巖壑之勝及歸詩畫益
工自號竹浪老人子柏齡崇禎庚午舉人任永嘉教諭
爲黃道周所重後自甌至閩流離困頓歸亦善詩畫

陳懋仁字無功性嗜古節俠自喜參軍泉州不以簿書廢

鉛槧記泉南事多故牒所未備足跡遍海內晚歸著述
凡二十餘種李維禎嘗曰予周覽天下五十餘年僅得
樵李陳無功一人著有石經堂集子蓋謨字獻可篤行
博學精考天文地理象數聲韻皆有師法著有皇極圖
韻諸書

屠中孚字德允康僖公勳曾孫攻苦好學賦性孝友撫孤
姪卹貧交慕義好施知無不爲邑令湯齊聘修邑志李
少卿日華總其成一切網羅編輯中孚及陳邦俊爲政
未卒業卒子用明復出所存故實以相佐著有重暉堂
聯合軒醉夢齋鄰虛閣愚菑館諸集及嘉興文獻志等

書

莊嚴字銘五嗜讀書纂錄甚富以歲貢除山陰訓導轉靖
州學正士風丕變卒祀鄉賢著有古今詩選山陰唱和
集子曰思字汝立貢成均攻苦績學遠近問業者多所
成就鄉里稱其孝友三舉大賓祀鄉賢著有四書尚書
說準白苧草

唐文選字儒章績學砥行言動有法事父母多孝行築室
白苧墓傍讀書教子著有飛虹館尚書稿叢桂軒等草
子堯夫堯岳堯夫以歲薦爲臨江訓導堯岳博綜羣籍
十二補諸生治詩古文詞工書法好施子著有剝廬集

白芎吟堯岳子珏亦有文譽

李貞開字泰卿少攻苦嗜學以貢司訓太平啟誘後學津
津不倦兼長詩古文詞膺薦擢江西會昌今年逾七十
罷歸卒著有北征焚餘涉江燕游姑熟銷夏烟雨樓詩
賦七種

許應培字伯厚少孤有至性精心舉子業淹貫經史擅古
文詞游臨川湯顯祖之門湯重之遣其子來禾就學名
流造請無虛日同郡黃洪憲陳懿典並以國士遇之董
其昌黃汝亨輩尤以翰墨爲莫逆交歷試南北二雍南
中副車齋志沒子鍊諸生狷介如其父

沈嗣選字仁舉好學能文爲諸生有盛名需次歲薦以親老不赴天性孝友乙酉奉母避兵葭川盜知爲老孝子戒勿犯生平破產聚書嘗謂自昭明後代各有選而南宋缺焉乃輯南宋文選百卷未梓著有儉娛堂集尙書論語傳等書明人私謚曰孝貞仲子椒衍亦知名

朱治憫字子暇天啟辛酉舉人選授肇慶通判宣勞戎務卒于官其詩磊落欽崙不沿時習

顧猷字若昔隱居教授工詩得中唐法俯視流輩烏程相欽其名引爲布衣交不之許著有桃花里集

顧玘徵字文玉居梅會里諸生履操方潔鄉里畏服之有

十五國風疏讀書臺吟稿

李日華字君實以進士授九江推官攝郡邑篆會監司以墨敗怒日華不爲援以蜚語挂議倅海州遷西華令轉南京禮部主事疏乞終養里居二十餘年孝養備至父沒仍補禮部晉尙寶司丞莊烈帝登極陳言佐新政旋乞歸晉太僕少卿日華恬澹和易與物無忤能書畫善賞鑒一時士大夫好古博物祥符王惟儉雲間董其昌爲最日華書畫亞於董博雅亞於王而兼二人之長知縣湯齊請修縣志垂成而卒著書甚富有恬致堂集味水軒日記諸書餘詳經籍

包爾庚字長明御史節曾孫崇禎丁丑進士知羅定州後
棄官爲僧終身不入城市爾庚少有文名爲制義精深
簡當字字刻入一時攻帖括者皆步趨之著有直木居
詩文集

李肇亨字會嘉太僕日華子留意圖書討論藏弃嘗與譚
貞默同主鴛社先後賦詩者三十三人工詩善繪事著
有寫山樓率圃夢餘諸草子新枝琪枝皆以詩繪聞于
時蕭師魯諸生性至孝工詩與吳梅村善著有魯庵集
鍾代英字幼芝嘗游九邊諸大帥幕如李寧武杜崧武皆
尊爲上客有傳舍稿質硯草其詩致深而思苦本之工